

سرى للغاية

اجتماعات مجلس الرئاسة
القاهرة - قصر القبة في ٧ نوفمبر ١٩٦٢
(الاجتماع الثامن)

الحاضرون

الرئيس جمال عبد الناصر، عبد اللطيف البغدادي ، عبد
الحكيم عامر، زكريا محى الدين، حسين الشافعى، كمال
الدين حسين.. نواب رئيس الجمهورية، أنور السادات،
حسن ابراهيم، على صبرى.. رئيس المجلس التنفيذي،
نور الدين طراف، أحمد عبده الشرباصى، كمال الدين
رفعت.

المحتويات

الصفحة	الموضوع
١	١- الوضع فى اليمن وتأثيره على القوات العسكرية المصرية هناك
١٠	٢- بحث القروض الخارجية والتزاماتها وقرار تقييدها
١٣	٣- مناقشة أسعار الأقمشة الشعبية وتصدير الفول والقطن
٢١	٤- البنك الدولى لا يعطى قروضا للصناعة
٢٢	٥- قواعد تعويضات الحراسة والتأمين بالنسبة للأجانب والمصريين
٤٩	٦- التجارة الخارجية والموقف النقدى الأجنبى
٥٤-٥٥	٧- توفير المياه لمزيد من زراعة الرز والقطن

سرى للغاية

قرارات مجلس الرئاسة

فى ٧/١١/١٩٦٢

بحث المجلس الموقف العام فى اليمن، والموقف الناتج من اعلان قطع العلاقات الدبلوماسية بين الجمهورية العربية المتحدة والسعودية.

كما بحث المجلس سياسة التجارة الخارجية، واطلع على قائمة الصادرات من الحاصلات الزراعية الرئيسية، والارتباطات الخارجية للقطن، وكذلك صادرات البلاد من المنتجات الصناعية.

قرر المجلس التوسع فى تصدير المنتجات الصناعية بكل أنواعها، ووضع أهداف لكل صناعة، وأهداف التصدير. على أن تتابع تنفيذ القرارات كلها، تقارير متابعة خطة التنمية الاقتصادية.

سرى للغاية

اجتماعات مجلس الرئاسة
القاهرة - قصر القبة فى ٧ نوفمبر ١٩٦٢
(الاجتماع الثامن)

السادات: ماشية فى الاتنين.. فى الشرق والشمال.

عبد الناصر: وبعدين الراجل عضو مجلس العموم اللى راح ده اسمه ماكلوى وشاف الاصابات.

حسين: السلال بيقول: إن المصريين..

معى الدين: ده طبعا سياسيا مش كويس مع ده اذا كان حقيقى..

حسين: ما هم بيدينوا يعنى هم تعاونهم التعاون الواضح باين كده إن فيه..

السادات: فيه سلبية.

معى الدين: فيه سلبية من القبائل اللى معاها.

السادات: ما هى دى النعمة اللى بيمشى فيها سعود.

معى الدين: لأ.. وفيه كلام ماشى على إن ضرب القرى بالطيران لها تأثير داخل اليمن، المفروض اليمنيين هم يضربوا مفيش حاجة!

السادات: هو أصلها المنطقة على العموم اللى تتضرب كلها يازكريا حتى فى حكم الامام لو كان عنده طيارات كان ضربها. يعنى عندك الجنوب كله والوسط والغرب اللى هم أكثر من ثلاث ترع اليمن مفيش حاجة أبدا، انما دول بالذات طول عمرهم.. ولا وسيلة ولا سبيل على فكرة لتصليحهم.

البغدادى: يعنى على الأقل دول المليون.

سرى للغاية

السادات: آه.. يجوا مليون، هم لغاية ما بس يتأدبوا كان كذا درس جامدين كده يمشوا.

عبد الناصر: وطبعا الانجليز..

السادات: لأ.. الانجليز بعد الكلام اللين الأولانى قلبوا دلوقتى واضح قوى إنهم..

حسين: متشددين دلوقتى.

السادات: آه.. متشددين قوى، وبعدين فيصل لما تشوف الحركة اللي عملها فيصل بيقطع العلاقات معانا ويعمل مؤتمر صحفى يقول: إحنا جاهزين للعلاقات مع انجلترا.. كده بالمفتوح.

محي الدين: هو لازم تمر معركة السعودية قبل ما يعترفوا على كل حال.

السادات: ما هي دي المشكلة النهارده بالنسبة للوضع كله معركة السعودية، هو كان المفروض أصل انجلترا حتعترف الأول قبل أمريكا.

البغدادى: باين منهم إنهم كده يعنى..

السادات: لأ.. انجلترا خلاص قلبت عايزه تخش يعنى عايزه تقوض المعركة مش عايزه تخليها، وأمريكا فيصل يظهر زانقهم.

عبد الناصر: بالنسبة للوضع فى اليمن.. عبد الحكيم بيدينا..

عامر: بعد أسبوع حصل طبعا الثوار بدأوا الجماعة بتوع البلد يحولوا جهودهم لينا هنا فى الشمال فى الساحل فى منطقة الجبال اللي عند صعدة؛ على أساس تسلل يجوا عن طريق الجبال عشان يصطادوا الطيران ويفاجئوا القوات. وفيه برضه فى منطقة الشرق فى الجوف، وفيه بودار عمليات فى اتجاه صعدة - صنعاء فى الشرق. وفيه برضه فى منطقة صرواح فى بيحان، وكل يوم أو يومين يعملوا عملية على أبواب صرواح.

سرى للغاية

ولكن يعنى أنا شايف إن الموقف بيزيد وبيرموا كلهم للمعركة، والوضع ما بين أسبوع وعشر أيام هيبقى أكثر .

وبعدين اللي بيشرح بعض القبائل فيه بعض القبائل كمان بيقلوا لنا: إنهم مع الثورة.. ولكن عملية القبائل عملية مابعة جدا والموقف واضح، ومشاكل جت من القبائل الموالية برضه، يعنى مكانتش عمليات قتال أو عمليات ايجابية ناجحة.

وفى الواقع الموقف باين إن احنا يجب ننظر فى الأسبوعين القادمين على إن يكون مركز الثقل للعمليات أكبر من الآن الحقيقة، وده كان من ضمن الخطة الأولى إن احنا لابد نضغط عليهم عشان القبائل الموالية تشتغل ولازم تشتغل فى مناطق محددة وبأعداد محددة وبأعداد معروفة؛ وده حيسندعى كمان إن احنا هنزود برضه القوات المصرية عشان نقابل المحاور.. محور عدن، صرواح، ومحور الجوف ومحور صعدة.

المحور التانى يجب إن احنا نحتفظ بقوات هناك كبيرة حتى علشان القوات السعودية الموجودة.

المنطقة الساحلية بالذات باعتبارها منطقة حاسمة وبالذات فى المواصلات ولذلك يجب يكون قوة كبيرة فى هذه المنطقة، يعنى الموقف بتاعها جايز إنها بتشتغل بكمية قليلة يعنى عمليات هجومية محدودة، ولكن لابد من وجود قوة رئيسية هنا مستعدة لتدخل سعودى.

الموقف فى المحاور التانية النهارده بيحتاج لقوات أكثر لسبب؛ لأن النهارده قوات الصاعقة والمظلات اللي هى المفروض بتشتغل قوات هجومية قوة موجودة فى صرواح وبتدافع عن نفسها فقط وبتعمل عمليات محلية حواليتها، ولكن لا تستطيع إنه تقوم بعمليات زيادة.

لما نقول: بيحان ليها قاعدة دلوقتى بتشتغل، برضه القوة اللي موجودة فى صعدة فيه جزء منها فى صنعا، وفيه جزء منها فى عُمران وموجودة فى المحلات الدفاعية بتاعتها وعلشان يخرج لعمليات هجومية لازم يخرج من ارتفاع.. دى ناحية.

الناحية التانية: احتمال تدخل طيران من عدن لازم نحط فى اعتبارنا إن جايز يدخلوا طيران، اذا دخلوا طيران لازم نقدر نستخدم أكبر قوة جوية، والقوة الجوية الوحيدة اللي نقدر نستخدمها النهارده هى استخدام مدفع الـ YAK وعدد محدود نظرا لأن المطارات محدودة وهنظر نعمل مطار جديد.

سرى للغاية

فإذاً دى خلاصة التحليلات، القبائل لازم تشتغل والحكومة لازم تشتغل بقوات تقدر تقوم بعمليات.

عبد الناصر: هو بالنسبة للعملية هو يعنى فيه واحد صحفى لبنانى بيقول Waterloo العرب، هي معركة الحقيقة فاصلة يعنى معركة حاسمة والحلف المقدس الرجعى يدخل هذه المعركة على أنها معركة حياة أو موت.

وقطعا أنا فى تصورى إن الأمريكان يعنى بيساعدوا السعودية لأنهم قلقين جدا من أثر هذه الثورة على مصالحهم. الانجليز أيضا بيتمنوا القضاء على الثورة وقلقين جدا لدرجة إنهم دلوقتى الاتحاد - اتحاد الجنوب العربى - عايزين يأجلوه ويحتفظوا بعدن كمستعمرة؛ بحيث اذا حصل وثار ت المحميات بيبقى الآخر ليهم عدن مستعمرة موجودة فى هذه المنطقة.

العمليات لغاية دلوقتى مهياش عمليات نظامية، يعنى فيه بعض قبائل معها البنادق ولكن معاهم مدافع مثلا أو هاونات أو مدافع ضد الطائرات من الأردن أو من السعودية.

الخطة اللى احنا اتكلمنا عليها الدور اللى فات طبعا فشلت وابتدوا يغيروا دلوقتى ويستخدموا الجبال، مهياش عمليات نظامية بمعنى الكلمة ولكن لغاية دلوقتى هي عمليات حرب عصابات.

البدر مدخلش اليمن لغاية دلوقتى، يعنى آخر معلومات إن البدر بعت وقال للصحفيين يوم الجمعة وحيودوه على الحدود يقول لهم أنا جاى من الجبال والكلام ده؛ عشان يعطل نفسه شوية وبعدين بيقعد هناك يعقد مؤتمر صحفى، وإحنا ممكن يعنى فى هذا بنقدر طبعا إن احنا نقفل له المؤتمر الصحفى من قبل ما ينعقد.. معروف حيبقى فيه ايه.

نظرا برضه لوضع قواتنا لغاية دلوقتى إحنا مش قادرين نتحرك، يعنى هو النهارده أنا كنت الظهر عند عبد الحكيم اذا كان الوضع كده أنا قلت: نرسل قوات أخرى علشان لازم نبقى عندنا امكانية الحركة وإلا حنقى مستهدفين فى الأرض. إحنا دلوقتى مثبتين على المحور الساحلى ومحور عمران عيس فى عمران لغاية صرواح ولغاية حرض بنطلع، ولكن نتيجة لهذه المنطقة منطقة الجوف برضه مش سهلة ولازم يشتغلوا علشان نخلص.

سعود بيحشد بقى فى حالة هيستيرية، وإحنا عندنا تفصيل حشده كله بالعربية والمدفع، الطيارين اللى بيشتغلوا معاه طيارين أمريكيان بيشتغلوا الطيارين السعوديين بقالهم دلوقتى أربع أيام.

سرى للغاية

بعد عملية حرض، الضرب اللى حصل أول امبارح فى البلد اللى على الحدود الضرب اللى قرب حرض اللى هم فيه خساير يظهر كتيرة فى القوات اللى كانت موجودة هناك، جى اشارات بيقلوا له: إن الجيش اليمنى الجيش الثورى فيه خساير كبيرة. وهى عملية حرض أساسا كانت عملية طيران، إحنا قواتنا المشاة دخلت على الساعة ستة كانوا هم يعنى الطيران بهدلهم؛ كان هو نازل من فوق ونزل على الساحل مكشوف والطيران لغاية دلوقتى بيضرب الجبال بيضرب العربيات؛ اشتغلوا الحقيقة شغل فى بلد مايعرفوهاش ومناطق مايعرفوهاش.. اشتغلوا شغل كويس معدناش خساير يعنى طبعا.

البغدادى: اشتغلوا كلهم.

عبد الناصر: اشتغل دلوقتى يعنى ٢٤ طائرة كلهم اشتغلوا ال bomber ميقدرش يضرب عربية ولا يقدر يضرب جمل، هو اشتغلوا الحقيقة من أول ضوء حتى آخر ضوء بيشتغلوا كله وبيعلموا تفتيش بيعلموا تفتيش واطى.

فالعلمية إن حالة هستيرية سعود، وطبعا قطع العلاقات والكلام ده متهيألى بنحدد له برضه علشان نعرف نرد عليه. وبعدين إحنا القوة اللى بنبعثها هناك بالنسبة للقوات يعنى بحيث إن احنا هنا قواتنا متقصص؛ وده طبعا يحتاج الى المزيد لأن احنا برضه بننتظر فى أى وقت إن اسرائيل تدخل، وبعدين طيارانا كله هنا موجود يعنى مستعد للقتال. خسايرنا عندنا حد من الضباط؟ ٢ فى عيس و ٢ فى معركة حرض و ٤ فى العمليات اللى كانت فى صرواح.. مجموع القتلى والمفقودين حوالى ٦٠، موضوع الجرحى حوالى ٤٠؛ يعنى العملية كلها تبقى حوالى ١٠٠.

طبعا فيه جزء كبير من هذا بالنسبة للى حصل فى صرواح واللى حصل فى الجوف، يعنى حرض الليلة مفيش غير ٢ ضباط و ٢ عساكر ٤ بس. هل حيسخدموا طائرات أو ميستخدموش؟ اذا استخدموا طائرات قواتنا مش هيجرى لها حاجة، لكن هم بيبقى عندهم تفوق جوى بيبقى على طول لازم قاعدة الطيران لازم، وأنا باعتبار يعنى السعوديين حيفكروا ألف مرة قبل ماياخدوا قرار.

سرى للغاية

وإحنا مستبعدين إن الانجليز هيدخلوا مباشرة، ولكن لازم نكون جاهزين للعملية دى
يعنى. ولما كان عبد الحكيم فى اليمن مدى هنا انذار للطائرات ساعتين، اذا حصلت أى
غارة فى خلال ساعتين يقوموا بالضرب؛ يعنى يكونوا مجهزين أطقم مخصوص مستنيه
ياخدوا الأوامر بعد ساعتين يدخلوا يخلصوا العملية.

الخطة طبعا هم يعنى شاربيين القبائل وقوات سعودية نظامية برضه باعتبار إنه
احتمال قد يكون بعيد؛ لأن النهارده القوات السعودية نزلوا من تبوك وحطوا بدالها قوات
أردنية وحطوا جنب جدة وعند المدينة قوات أردنية؛ فهو بيحشد، هو حشد لغاية دلوقتى
لوائين وحجيب الكتيبة بتاعته اللي فى الكويت.. لوائين تدريبهم يعنى ضعيف.. فالعملية
دى هى نقطة تحول زى الراجل اللي قال عليها Waterloo.

محي الدين: ايه الهدف من الحشد؟ يعنى لازم يفكر إنه لازم له هدف قطعاً.

عبد الناصر: والله هو قلقان خايف برضه على ضرب البدر مثلا، والبدر مش راضى يدخل لغاية دلوقتى
مدخلش فإذا حصل مثلا الجماعة دول انضربوا..

محي الدين: يبقى دفاع يعنى.

عبد الناصر: أصل جيزان ونجران ومنطقة..

السادات: عسير.

عبد الناصر: عسير أصلها بتاعت اليمن.

محي الدين: بالنسبة لخطوط المواصلات البحرية اذا تدخلنا يعنى..

عبد الناصر: طبعا.

سرى للغاية

محي الدين: هم معندهمش ولا حاجة.

عبد الناصر: عندهم زورق عطلان!

أصوات: (ضحك)

عبد الناصر: باعتين طالبين زورق.

محي الدين: يعنى يمكن مثلا الانجليز والأمريكان يدوهم؟

صبرى: ممكن.

عبد الناصر: يعنى إحنا اللي دخلنا وحاطين فيها محطة اذاعة، هل الانجليز حيدخلوا؟ برضه حنشوف ولكن هو هم عندهم أمل إن الحكم هينهار من الداخل فهم نازلين وراء السعوديين والأردنيين. فيه معلومات بتيجى بقى تقول: ٤٠ طيارة، والكلام ده كل ده كلام غير مؤكد وأنا أعتبره معلومات فيها محاولة رفع الروح المعنوية فى داخل السعودية. طبعا هم بيقلوا خدوا صعدة مخدوش صعدة، خدوا صرواح مخدوش صرواح وقالوا: إن فيه ناس راحوا فى عدن زى جرحى.

محي الدين: عمليات المواجهة غير حرض اصاباتهم يمينين يعنى.

عبد الناصر: مفيش غير حرض.

محي الدين: مكنتش فيها قوة مهاجموش موقع دفاعى بقوة كده!

عبد الناصر: هاجموا من بعيد صرواح لكن ماقتحموش.

سرى للغاية

عامر: لأ.. اقتحموا جابوا عربيات..

محي الدين: وشوية هاونات مفيش اقتحام حصل.

عبد الناصر: لا.. ماحصلش اقتحام.

ابراهيم: دول ماقتحموش إلا بالذخيرة..

الشافعى: آه.. يبقى مضمون يعنى يقتحم على مضمون.

البغدادى: يعنى كله ببساطة يعنى خايف البدوى يشيل له ثلاثين طلقة أو أربعين طلقة وعملية مش قليلة.

محي الدين: أنا بقول: يعنى اذا كان تكتيكه هو عدم الاقتحام ده يدينا فرصة عشان نقلل قواتنا الدفاعية على قدر الامكان.

عبد الناصر: لأ.. هو يحرر.. هو يعمل ايه؟ هو ماقتحمش يحاصر ويقطع.. يروح محاصر وقاطع.

محي الدين: القطع ده مالوش حل أبدا غير القبائل.

عامر: صعدة صنعا لو سبناها إحنا القبائل اللي هنا..

محي الدين: دول قوات صغيرة اللي عندهم.

عامر: القوات الصغيرة صنعا بتحاصر من يعنى..

السادات: من اللي جنبها.

سرى للغاية

عبد الناصر: هو بالذات يعنى خط عمران - حجة - عبس ده اللى..

عامر: وبعدين صرواح.

عبد الناصر: وبعدين بيحان وصرواح، وبعدين بعد كده لازم نفرش بقى أدام عمران ونطلع تانى، وبعدين إحنا نقدر نطلع من السهل اللى هو من حرص ٦٩ كيلومتر من حرص لصعدة.

حسين: طريق سهل؟

عبد الناصر: لأ.. يعنى فيه طريق يعنى انشاء الله مشاة، وبعدين من صنعا لصعدة.

صوت: ١٠٠ كيلومتر.

عبد الناصر: وفيه طريق هو اللى جزء منه داخل السعودية لحد الحدود ماشى، والعملية هتاخذ وقت برضه هم يعنى..

رفعت: مش ممكن عمل عمليات فدائيين داخل السعودية؟

عبد الناصر: هو كان المفروض امبارح بيعملوا عملية هناك اللى هى مش قتالية كألغام وقفل السكك وقفل الطرق، والكلام ده كان المفروض يحصل من بدرى شوية. الحقيقة يعنى الحركة هنا تفيدنا جدا، دلوقتى الأردن نازلة على تبوك على جدة على تحت بالعربيات قوات مستمرة هناك، إحنا من هنا ممكن هذا الطريق بنقله خالص بدون عمل. يعنى أنا شفت إن فيه تحت ضيقة جدا الطريق اللى نازل من فوق بيبقى قريب من البحر، وبعدين الطريق ما بين جيزان ومكة اللى نازلة عليه المعدات كلها اللى هو الطريق الوحيد أيضا لاف فى البحر، وبرضه لو بنعمل فيه شوية ألغام بنحل العملية، وبعدين الطريق من جيزان لتحت الحدود كذلك. كل العمليات دى يعنى ممكن نعملها، لكن مش عايزين نعمل عمليات فدائيين هجومية يعنى هو السعودية برضه عايزين ميقالبوش علينا الناس.. يعنى عايزين حالة غليان ضد السعوديين جوه السعودية. ولذلك إحنا طلعا النهارده بنقول ده كذب وعايزين

سرى للغاية

يغطوا الخسائر اللى بيقوموا بيها فى حرض والكلام ده، لكن اذا قدرنا نصطاد أى عربية فيها قوات لكن لو ندخل جوه نعمل raid..

رفعت: لأ.. يعنى تعطيل الطريق نفسه.

عبد الناصر: هى عملية الألغام أنا بعتبر إنها تهد جميع التحركات.

البغدادى: مفيش تعويض عن المطار اللى بيقترحه عبدالحكيم فى الجنوب، ده حياخد وقت.. طبعا هو مهم لكن حياخد وقت.

عامر: فيه بس فى أسوان.

الشافعى: الغردقة فيها.. آه.

عبد الناصر: أسوان؟

البغدادى: بعيد، على اعتبار إن ده حرى أسوان فيها عمليات مدنية.

صبرى: الـ ٢٨ ميشتغلش فى الغردقة.

ابراهيم: الـ ١٢٠٠.

عبد الناصر: دى مبتوصلش.

فيه أى حاجة تانى؟

عامر: لا.

عبد الناصر: الموضوع التانى اللى أنا عايز اتكلم فيه: هو موضوع القروض الخارجية والتزاماتها وبعدين مواعيد تسديد القروض وبعدين لا يعقد أى قرض أو ائتمان أو أى حاجة حنسددها لا تعقد.. يعنى لا أى التزامات تعقد لأن هو فرصة النهارده أى واحد بيقدر يعمل قرض.

سرى للغاية

صبرى: أو بضايح.

عبد الناصر: أو بضايح آه.. لأن اللى أنا متصوره إن احنا واخدين قروض وما احناش عارفين أولها ايه ولا آخرها ايه! وباعتبر إن لما كان هنا بلاك كان أثار النقطة دى وقال: إن فيه إن امكانية لاعادة النظر فى شروط هذه القروض ومدتها وفايدتها، بس متهيألى محدش يعرف الصورة كويس. وبعدين بنستسهل طبعا بالنسبة للوزارات إنه يعقد قرض أو ياخذ credit، فيه خوف إن نيجى يوم نلاقى نفسنا بندفع التزامات علينا أد ايه النهارده؟

البغدادى: بالنسبة للقروض بمعنى القرض محدد ومعروف يعنى لكن..

عبد الناصر: لأ.. لأ.. اللى على أفساط ما هو ده اللى أنا بقصده قروض وتسهيلات.

البغدادى: فيه تسهيلات وبعدين ما بستخدمهاش وبتبان شكلا إنها قروض.

عبد الناصر: لا.. ايه الحاجات اللى احنا التزمنا بيها ومواعيد دفعها؟

البغدادى: يعنى هو الاتفاقية لازم تبلغ البنك المركزى بيلغه يعنى.

عبد الناصر: ما هو إحنا دلوقتى حناخد فكرة عن الموضوع ايه، وبعدين مفيش حاجة تتعمل إلا اذا جت هنا.

البغدادى: هو فيه مقترح يعنى لابد البنك المركزى أو وزارة الاقتصاد..

صبرى: يسمح لهم.

عبد الناصر: يعنى أنا طلبت من وزارة الاقتصاد ماجاتليش ولا البنك المركزى، وبعدين أنا طلبت من التعبئة تشوف العملية برضه ماردوش! يعنى موضوع الاقتصاد ما ده شغل الاقتصاد أُمال وزارة الاقتصاد بتعمل ايه؟! أو البنك المركزى!

سرى للغاية

صبرى: هو فعلا الموضوع ده برضه أثرناه فى المجلس التنفيذى وخارج المجلس أثرته مع زन्दو برضه وأنا بناقش الكلام بتاع بلاك؛ هو اللي موجود عندنا محدد دلوقتى القروض يعنى بمعنى الكلمة واللى لها توقيتات فى الدفع.

عبد الناصر: طب والـ credit ؟

صبرى: الـ credit facilities هى اللي مش موجودة ومش محصورة.

عبد الناصر: طب مثلا بيقولوا لى فيه ٢٠ مليون وأنا أبص لأقيها طالعة ٨٠ السنة اللي فاتت!

طراف: السنة اللي فاتت؟

عبد الناصر: من ٢٤!

طراف: السنة اللي قبل فاتت.

عبد الناصر: بغدادى جاى بيقول لى: لأ.. التزامات مصر بدل ٢٤ بقت ٨٠ مش عارف أعمل ايه! طيب أنا لما يقول لى ٢٠ بناخد خطتنا وبندخل فى التزامات على أساس إن كانت التزاماتنا ٢٠!

صبرى: هو دلوقتى كنت طلبت من زندو إنه يحصرها، ومبدئيا يحصرها بواسطة البنك المركزى على أساس إن فى البنك المركزى أى واحد بياخد تسهيلات ائتمانية أول ما يفتح اعتماد بيروح مسجل على طول كمية القرض بالكامل، وبعدين توقيتات الدفع يمكن دى حثدينا صورة عن الحاجات اللي تعاقدا عليها فعلا.

سرى للغاية

عبد الناصر: وأنا رأيت إن وزارة الاقتصاد لازم تخطط من أول وجديد على أساس الخطة على أساس سليم، يعنى يسيبوا الوزارة دى تشتغل ويبتدوا يعملوا زارة جديدة لأن ما فى فايدة لا فى وزارة النقد ولا فى التخطيط ولا عمره حينصلح حاله يعنى والله! يعنى يبتدى الوزير يقول ده وفيه وده كذا ويعمل ياخذ كذا، وبعدين اللي يفضل فى الآخر الوزارة القديمة ويبتدى أرشيف جديد وعملية جديدة؛ لأن العملية ملخبطه يعنى خالص وفيه ناس فاسدين فى عمليات كتيره يعنى خصوصا فى التراخيص والاستيراد والتصدير! يعنى كأننا بننشئ وزارة جديدة؛ وبهذا نضمن تنظيم جديد وأفرع جديدة وبرضه نضمن إن العملية تمشى سليمة.

البغدادي: خصوصا أنا لما استخدمت عملية التسهيلات الائتمانية فى وزارة النقد، ما دام فيه تسهيل ائتماني بالتخطيط مع..

عبد الناصر: دلوقتى إحنا حنعمل بقرار وبعدين لازم بقرار فى الوزارة..

البغدادي: نعم.

عبد الناصر: قبل ما نتعاقد.

الشرباصى: كان صدر قرار من السيد الرئيس من سنتين بإنه مفيش أى تسهيلات أجنبية إلا بعد موافقة وزارة الاقتصاد يعنى لابد أن تكون محصورة عندها، يعنى مكانش أى وزير فى ذلك الوقت بعد هذا القيد أصبح حر بدون الرجوع الى الوزارة المختصة اللي هى الاقتصاد وقرار هذا.

عبد الناصر: آه.. ما القانون يلزم العمليات اللي فيها قرار، لازم ننظم هذه العملية ١٠٠٪. فيه حاجة؟

الشرباصى: هو فيه جاية لى شكوى دلوقتى إنه الكستور ثمنه مرتفع وده بالنسبة إنه قماش شعبى..

عبد الناصر: السنة اللي فاتت يعنى؟

الشرباصى: أيوه.. هل صحيح إنه مرتفع.

سرى للغاية

عبد الناصر: ده الأقمشة الشعبية..

الشرباصى: الأقمشة الشعبية.. الكستور ونوع تانى منيش عارف هل صحيح إنه مرتفع عن السنة اللى فانتت؟

صبرى: ٢ مليم ده حسب الميزانية الجديدة، يعنى الميزانية المقدمة على أساس إنه بتترفع الأقمشة وتندرج، يعنى الأقمشة بولين والحاجات دى بتترفع أكثر وبعدين تدرج بالنازل لغاية الكستور أو الأقمشة الشعبية بتبقى اتنين مليم.

الشرباصى: هو النوع ده ونوع تانى مش فاكر اسمه القماشين الشعبيين دول.

صبرى: ده الدبلان.

عبد الناصر: والله بنشوف أسعار السنة اللى فانتت وأسعار السنة دى.

الشافعى: كان فيه كلام بالنسبة إن فيه رسالات من الغزل من المنسوجات ده فى التصدير اترفضت مش عارف يعنى اترفضت من أمريكا، أظن بالنسبة لشركة الغزل الأهلية وحاجات البيضا كميات كثيرة فمش عارف تفاصيلها أد ايه يعنى.

صبرى: الموضوع أمريكا موضوع مش رفض عشان خاطر quality.

الشافعى: ده بيقولوا: عيوب ظهر فيها عيوب بالذات، يعنى أنا سمعتها من عامل كان اترقد وراح يعنى ياخذ المكافأة بتاعته وبعدين كان بيقول: إن فيه حاجات غلط بتتعمل وبعدين وبعد كده..

عبد الناصر: أنهى شركة؟

الشافعى: فى شركة الغزل الأهلية اسكندرية.

سرى للغاية

ابراهيم: فيه موضوع بتاع الفول اللى اشتريناه السنة اللى فاتت، بالنسبة لمحصول السنة دى طلع كويس فحاولوا يصدروا كميات من الفول اللى كان مخزن عندنا السنة اللى فاتت وصدر.

البغدادى: هو كان فيه حوالى ٣٠ ألف طن.

ابراهيم: أكثر.. آهو يمكن بقى زاد على المحصول ده حيصدروا حوالى ٧٠ ولا حاجة، صدروا حوالى ٢٠ بالعملة الحرة بسعر..

عبد الناصر: بكام؟

ابراهيم: بسعر مقبول هو فيه خسارة علينا صحيح لكن السعر مقبول، وبعدين صدروا للصين كمية أكبر داخلة فى الاتفاقية وبسعر أقل رغم إن اللى صدر للدول الغربية صدر بالعملة الحرة، والعملة دى قطعاً فيها خسارة يمكن صحيح عندنا فول زيادة ومفيش مفر من إن احنا نصدره.

عبد الناصر: سألت يا على؟

صبرى: أنا سألت بس لسه مجاليش الرد الحقيقة.

عبد الناصر: ازاي نستورد بسعر أعلى ونصدر بسعر أقل؟!

محي الدين: الفول سوقه محدود جداً شغله محدود.

البغدادى: هم اشترتوا وبعدين بيصدروا تقريبا بنص السعر اللى احنا اشترينا بيه، ففيه ٢ مليون..

ابراهيم: فيه خسارة.

البغدادى: خسارة فى عملية الفول السنة دى المحصول زائد الفائض.

سرى للغاية

ابراهيم: هو فيه اقتراح لتحويل الفول الى علف وتصدير الكسب.

البغدادى: متهياً لو عملنا الفول علف يبقى غالى جدا وبرضه حتبيعه بالخسارة، يعنى خسارة يمكن تكون أزيد.

ابراهيم: لأ.. يعنى الكسب تقدر تصدره وبعدين تقدر تحط فى العلف نص كمية الفول. الكسب سعره مجزى قوى.. بتصدر الكسب وتخلي ده هنا يعنى دى الفكرة.

عامر: طب ليه الفول مانخزنه للسنة اللي جاية؟

البغدادى: بيسوس والصوامع دى مليانه؛ يعنى فيه مجموعة من الدول دخلنا على أساس مساعدة بعضهم بمواد غذائية من الهند، فإحنا دخلنا بجزء من الفول وقلنا: ندى حصتها بتاعت التلات سنين السنة دى وهى يعنى بمقابل حوالى مليون جنيه وإحنا بناخد ما يقابل هذا سلع أخرى غذائية، وإذا قلنا على أساس التخزين بيخسر.

صبرى: طيب موقف الفول، هو الحكاية إن السنة اللي فاتت محصول الفول كان صغير جدا فتشجيعا للزراع راح بقى فى اللجنة الزراعية ارتفع السعر الى أطن ٨ جنيه عشان يشجعوا. وبعدين حصل مقاومة وحصل تركيز برضه فى المقاومة بتاعت الفول فجاب محصول كويس جدا أعلى من الاستهلاك المحلى بـ ١٥٠ ألف طن، وبعدين السوق العالمى سوق محدود جدا بالنسبة للغرب كله بيستعمل علف وألمانيا أساسا هى اللي بتستورده. وبالنسبة للدولة الوحيدة اللي بتستهلك كمية كبيرة هى الصين، ولذلك إحنا ملزمين إن احنا نبيع للصين لأن مهما ركزت على عملة حرة مفيش دولة بتشتري الفول والكمية اللي راحت ألمانيا مش حتروح غيرها بعد كده لأنه مفيش. اضطررنا نبيعه للصين بالخسارة لأن خدناه من الفلاحين بـ ٨ جنيه ويمكن هو تمنه بره يوصل ٤,٥ أو ٥ جنيه، اللي تعاقدا عليه حوالى ٩٠ ألف طن لغاية دلوقتى للتصدير.

سرى للغاية

ابراهيم: هو فى الناحية دى بالنسبة للصين، هو اللى صدر لألمانيا كان المفروض يصدر فى كياس نمرة واحد يعنى جديدة، وبعدين ماوجدش كياس جديدة فعملوا لهم تخفيض ١٠ شلن على إنه ياخذ كيس مستعمل نمرة واحد، والصين طلبت نفس الشئ وبعدين خفضوا لهم جنيه. يعنى هو السعر اللى صدر بيه ٢٦ جنيه و ١٠ شلن أو حاجة زى كده للمنطقتين، لكن خفضوا جنيهه.

عبد الناصر: زدودوا يعنى حطوا للجيش فول، مثلا لو ما تحطوا فول كل يوم بدل عدس الصبح بيبقى أحسن لأنه بيستهلك أحسن.

ابراهيم: آه.. بيستهلك أكثر والفاصوليا.

عبد الناصر: طب ماتاخذوا فول بدل العدس.

الشرابصى: وإحنا بنستورد عدس كمان.

صبرى: لا.. العدس السنة دى حنصدر.

عبد الناصر: يعنى بالنسبة للعساكر أحسن.

عامر: آه.. أحسن لهم يعنى يحبوه.

الشافعى: عندك فاصوليا وعدس.

صبرى: نخلى الفول ونصدر العدس.

عامر: آه.. كويس.

ابراهيم: هو كان برضه السؤال بتاع القطن، يعنى عايزين برضه حركة أكثر فى تصدير القطن.

سرى للغاية

صبرى: عندى البيانات.

البغدادى: طلبنا البيانات امبارح، تقريبا التقديرات السنة دى تقريبا نفس المعدل.

ابراهيم: نفس المعدل ونفس الارتباطات.

البغدادى: الصادرات ٢٠١ ألف قنطار السنة دى مقابل ٢٦١ ألف السنة اللي فاتت.. تقريبا نفس المعدل.

صبرى: هو الأسبوع اللي فات المجلس طلب إن احنا نبتدى فى المجلس التنفيذى بوضع تقرير الخطة.. تقديم تقرير الخطة عن السنة الثانية فى خلال ٣ أسابيع وده سيكون جاهز فى الميعاد، كذلك تقرير المتابعة بتاع الـ ٣ أشهر الأولانيين وبتوع السنة دى.

عبد الناصر: الأولانى أنهى؟

صبرى: الخطة بتاع السنة الثانية التقرير مش النهائى، انما التقرير الأولى بتاع الخطة فى السنة الثانية سيكون جاهز فى خلال ٣ أسابيع، وكذلك التقرير بتاع المتابعة بتاع الـ ٣ أشهر الأولى من السنة دى.

بالنسبة لمشروع السنة الرابعة كان مطلوب تقديمه فى شهر فبراير، وبعدين فى المناقشة التخطيط طالب إن احنا بنأجل ده لإبريل علشان يقدرُوا يدوا صورة أحسن من الصورة فى فبراير؛ لأن عادة فى الـ ٣ أشهر الأولانيين أو فى الـ ٥ أشهر الأولانيين من السنة بتبقى الأمور ماشية يمكن ببطء شوية، وبعدين تبتدى تاخذ الشكل بتاعها الحقيقى بعد أو فى خلال الربع الثالث. على ضوء الربع الثالث بنقدر نعرف تقريبا حنقدر ننفذ ايه فى السنة الرابعة.

سيادتك توافق نخليها لإبريل؟ هى يمكن حنكون زنقة شوية بالنسبة لأن إبريل لازم الميزانية وحببقى بحث الخطة والميزانية. ولكن دلوقتى الحقيقة الميزانية هى فى الواقع صورة عن الخطة، فحتبقى العملية تبحت فى نفس الوقت خطة السنة الرابعة وفى نفس الوقت وضع الميزانية.

سرى للغاية

هو اللى باين لغاية دلوقتى من الـ ٣ أشهر الأولانيين الأرقام المبدئية إنه اتنفذ ١٥٪
يعنى ده رقم عام كده يعنى تقديرى.

عبد الناصر: الزراعة ١٥ ولأ أقل من ١٥.

صبرى: ده الرقم الاجمالى بتاع ١٥٪ فى الـ ٣ أشهر الأولانيين، ولكن يعنى ده مبيديش الصورة لأنه
عادة مبيديلوش إلا بعد شهرين من الميزانية النقدية الحالية.

البغدادى: معدل التنفيذ كمعدل ماشى باستمرار معدل واحد، لأ.. المفروض النقد المحلى حسب
الميزانية.. طب ما أنا حجيب له الخام ما هو بياخد نقد محلى هو بيشتري بيه حديد وخشب
وغيره، انما هو المفروض بيطلب من البنك نفسه عشان يشتري احتياجاته عشان يدفع
أجور وعشان ينفذ احتياجاته، طب وزارة الخزانة مبردش! يعنى ده معرفش مصطفى خليل
الكلام ده سمعته منه قدام الأخ الشرباصى قال: بنطلب بالفعل، قلت له: إنت مابتكلمش
ليه قدام المجلس التنفيذى؟

عبد الناصر: متكلمش معاك ولا حاجة؟

صبرى: مصطفى خليل؟

عبد الناصر: آه.

صبرى: لأ.. لكن هو..

البغدادى: أنا سمعت مصطفى خليل.

عبد الناصر: ماتسيبوش العملية دى ولازم تتابعوهم أول بأول.

سرى للغاية

البغدادي: لأ.. ما إحنا نظمنا العملية قلنا: كل الاعتمادات الخاصة بالوزارات والهيئات تتحط فى البنك المركزى. لو اتحط لك مال فى البنك المركزى روح اسحب منه ميقدرش يسحب يحط فى بنك تانى، وبالتالي النقد عمل مشكلة اذا كان يسحبهم ويحط..

عبد الناصر: والحكومة كان بيطلع مدين يعنى؟

البغدادي: مدين مشروط لأنه يسحب ودلوقتى..

عبد الناصر: يعنى يسحب مثلا من حساب الحكومة ويحط فى بنك مصر وياخد عليها فائدة ٢%!
(ضحك)

أصوات: (ضحك)

البغدادي: وبعدين حساب الحكومة فى البنك المركزى لازم تدى الخزانة بيان باستمرار يعنى بالسحب. يعنى السنة اللى قبلها كان باستمرار كل حاجة يوم بيوم بنحاول نغطى العجز الموجود.

صبرى: هو أساسا الموضوع يعنى حاجتين بالنسبة للخطة..

الحاجة الأولانية: هى الميزانية النقدية أكثر منها الميزانية العادية هى اللى معطلة التنفيذ، والميزانية النقدية من حصيلة المحصول بتاع السنة اللى فاتت.

الحاجة الثانية: بالنسبة للموضوع ده هو إن الخزانة كانت بتعطل. هو موضوع

صندوق النقد الدولى اتكلمنا فيه إنه محدش النهارده بيروح يقول أنا عايز المبلغ بتاعى

الموضوع فى الخطة، بنقول له: لأ.. الائتمان لا يزيد عن ٣٠ مليون جنيه عن مارس السنة

اللى فاتت، فيما عدا محصول القطن هو ده اللى كان معطل العملية. وبعدين أنا اتفقت مع

زندو إن احنا بنطلع القطن والرز والبصل يعنى بنطلع كل المحاصيل الزراعية الأساسية

من عملية الـ ٣٠ مليون، زائد إن احنا بنحط المصنوعات اللى ناتجة من المحاصيل

الزراعية برضه خارج الـ ٣٠ مليون؛ وبالطريقة دى يمكن نقدر نزود الائتمان بصورة

واضحة.. يعنى غزل القطن ومنسوجات القطن بنطلعها من الـ ٣٠ مليون.

سرى للغاية

عبد الناصر: الرز والبصل؟

صبرى: كله.. كل المحاصيل الزراعية الثانية حتطلع من الـ ٣٠ مليون.

طراف: بس هل البنك المركزى يوافق على هذا؟

صبرى: آه.. يعنى البنك المركزى أخطر صندوق النقد وقال لهم: إحنا حنعمل كده وخلص، وهم مارفضوش وماقالوش لأ يعنى.

طراف: هو ده معقول الحقيقة.

البغدادى: يعنى قلنا: كمان المحاصيل يبقى لازم تدخل فى العملية.

صبرى: المحاصيل طلعت فعلا يعنى ده..

عبد الناصر: يعنى هم الحقيقة برضه الجماعة بتوع النقد دول من ناحية التصنيع، لما جه بلاك ويعد ما اتكلمنا وبعدين بيقول: هو عايز يساعدنا فى كذا وكذا وكذا، وهى القروض اللي عليها فوايد وإنهم دلوقتى عاملين IAD اللي هو المنظمة الجديدة من البنك الدولى بتدى قروض على أربعين سنة بدون فائدة.. حاجة كويسة. قلت له: طيب بتدونا قروض ايه يعنى صناعة؟ قال: لأ! (ضحك) قلت له: إحنا أساسا بناخد قروض للصناعة، قال لى: لأ.. إحنا مابنديش قروض للصناعة، انتهى الموضوع يعنى اتقفل.

طراف: أمال بيدوها لإيه؟

عبد الناصر: بيديها تعمل طرق تعمل موانى.. متهيألى تعمل كبارى.

حسين: يعنى استهلاكية.

عامر: مواصلات حاجات مستهلكة.

سرى للغاية

محى الدين: خدمات كله.

عبد الناصر: صناعة.. لأ! تشتري طائرات ممكن، وقال: فى القرض بتاع قناة السويس يدينا قرض جديد.. فعلمية الصناعة قالوا: لأ.

صبرى: الموضوع التانى الحقيقة الموضوع بتاع الحراسة اللى أثير وأنا ناقشته مش فى المجلس انما فى لجنة خاصة. لو حددنا رقم معين الباقي حيبقى سندات؛ يعنى فيه حلول يإما سندات أو سندات مجمدة، والنظرة دى هى بالنسبة للأجانب أكثر منها بالنسبة للوضع الداخلى. القيسونى كان بيتكلم على أساس إنه حتى فى مفاوضاتنا مع الدول الأجنبية الخاصة بالتأمين والحاجات دى، رابطين ما بين التأمين وما بين الحراسة. أساسا السويسريين واللبنانيين كان السفراء اتكلموا معايا برضه قبل كده فى الموضوع ده، هم مش قلقانين على التأمين عارفين التأمين فيه قواعد معينة هم قلقانين أكثر على الحراسة. ويمكن السويسريين شاعرين كويس قوى إنهم فى عملية الحراسة دى مش حياخدوا حاجة؛ ولذلك مش عايزين يتفاوضوا أبدا ويفتحوا أى باب للمفاوضة فى عملية التأميمات إلا بعد أن نتفق إن احنا ننظر فى الموضوعين فى نفس الوقت. بس عايزين توجيه، عشان القانون لما يطلع يعنى هل بنعتبرها سندات قابلة للتداول أو سندات على الخزينة بيصدرها وزير الخزنة زى بتاعة الاصلاح الزراعى أو سندات مجمدة؟

عبد الناصر: أو مفيش حاجة.

صبرى: مفيش حاجة يعنى معناها مصادرة.

عبد الناصر: كان ليك تعديل بدل مصادرة قلته فى الجلسة اللى فاتت.

سرى للغاية

طراف: مش فاكرو والله آسف.

عبد الناصر: قال تعبير.

حسين: ده حاجة تانية تعويض؟

عبد الناصر: منقولش كلمة مصادرة لكن قال كلمة.

السادات: مؤدب! (ضحك)

حسين: تعبير عن المصادرة ولكنه يؤدي نفس المعنى.

طراف: ولكن لما أدور على التعبير مش باين! (ضحك)

عبد الناصر: عايزين النهارده نخلص عملية الدين العام.

محي الدين: الأولانى.. كان سندات كلها.

عامر: طب ما نعمل نفس الموضوع.

صبرى: هو ده حل وفيه حل تانى إنه تبقى سندات مجمدة.

عبد الناصر: يعنى ايه سندات مجمدة؟

سرى للغاية

صبرى: آه.. بس من ناحية الشكل ما هى معناها إنها مصادرة يعنى.

عبد الناصر: لأ.. الأول نقول سندات مجمدة، منقولش مصادرة ندى له سندات مجمدة.

صبرى: لأ.. تدى نتيجة مصادرة يعنى مش حدى الـ ٢٥ جنيه مش حديهم حاجة خالص.

عبد الناصر: فى الشكل؟

صبرى: آه.

عبد الناصر: ما نعمل.

البغدادى: سند ميتداولش يعنى؟

صبرى: آه.. سند غير قابل للتداول.

طراف: انما مالوش فوايد يعنى؟

صبرى: من غير فوايد.

طراف: لاله فوايد ولا يستأنف.

البغدادى: دين معلق يعنى.

طراف: يعتبر مصادرة! (ضحك)

أصوات: (ضحك)

عبد الناصر: القيسونى؟

سرى للغاية

صبرى: لأ.. هو يعنى كان بيفضل حاجة زى الاصلاح الزراعى.

عبد الناصر: عايزين نخلص من العملية دى.

عامر: ما ناخذ الاتنين مع بعض.

عبد الناصر: طب ما هو السندات المجمدة بتخلص العملية، ما دى زى دى لأن هم الأجانب النهارده السندات اللى قابلة للتداول اللى طلعت فى ١١٧ و ١١٨ و ١١٩..

صوت: يتفاوضوا عليها.

عبد الناصر: لأ.. أنا قلت لهم متدوش سندات ولا تتداول ولا تطلع ولا حاجة، ليه؟ لأن قصى كل واحد حياخد سندات و يروح يبيعهها وانشاءالله يبيعهها بـ ٥٠% اللى عنده ٣ مليون جنيه.

عامر: إحنا نعمل الحراسة، ما نزود الحراسات علشان نصفى الموضوع.

عبد الناصر: لو بالنسبة للأجانب والمصريين لو بنقول بندى سند بنتفاوض حدى الأجانب إحنا ٥٠% على عشر سنين أو ٦٠% أو حاجة زى كده مش كده؟ محاصيل معينة القطن هو ده اللى اتكلمنا فيه.

محي الدين: القطن ٣٠%.

عبد الناصر: وبعدين بيبقى خلاص سقطت العملية الدين مجمد يبقى سقط.

صبرى: وبالنسبة للتأميم؟

سرى للغاية

عبد الناصر: آه.. أما أعمل الحراسة النهارده بقى وبحولها الى سندات كأنها منتهية.. نفس العملية.

صبرى: آه.. بس حياخد عليها تعويض زى التأميم بالضبط يعنى حيتفاوض عليها.

محي الدين: حياخد نسبة على القيمة.

عبد الناصر: الحراسة عملية أصلها ازاي بتحددها؟ بتفك الحراسة يابتأممها، عملية التأميم بتدى له سند تداول ولا تدى له سند مجمد، عشان تتفاوض مع الدولة الأجنبية لازم تاخذ اجراء ياتأممها فلانم الأول ناخذ اجراء. متهيالى بنعمل سند مجمد هو اللى بيبقى معقول بالنسبة لتصفية الحراسة.

الشافعى: بالنسبة للأجانب يعنى برضه يمشى نفس..

عبد الناصر: ما هو ده العملية.

محي الدين: بالنسبة لعملية الحراسة إحنا خدنا الزوجات والأولاد، هل العملية تنطبق على الجميع؟

عبد الناصر: برضه بالتقدير.

محي الدين: آه.. الفرد وأسرته وعيلته، لكن الغالبية طلعت وفيه أفراد لا يملكو شيئاً يعنى طلع بس كعقوبة وواحد زى بلال الزمر ده مبيدفعلوش عشرين جنيه!

صبرى: ده فيه مدين! (ضحك)

محي الدين: ولكن عايش على أرض مراته، وإحنا دخلناه ودخلنا مراته على أساس إن إحنا نضايقه شوية أيام. هو يعنى بقول: العمليتين مرتبطين ببعضها وطبعاً لو فيه نسبة يعنى تتدفع % ولا حاجة يعنى بشكل عام، وتقريباً متعتبرش دين عام انما يعنى نحافظ على الشكل العام. والله فيه نقطة إحنا بندفع منها ٢٥ جنيه فى..

سرى للغاية

السادات: فى السنة. (ضحك)

محي الدين: وواخدين منهم يجى ٦٠٠ فدان أو ٧٠٠ فدان الفائض.

عبد الناصر: ماقلنا: بلاش يازكريا!

أصوات: (ضحك)

محي الدين: بقول يعنى إحنا مش حنخسر حاجة لو ندفع لهم خمسة وعشرين جنيه فى السنة أدى الحكاية. وبعدين النقطة الثانية برضه إن احنا الشكل لو أنا اقول مثلا ١٥ سنة وبرجع أجددها تانى يمكن تكون أحسن.

عامر: الاصلاح ٣٠ - ٤٠ سنة.

محي الدين: أكثر من كده الاصلاح قلت ١٥ ورجعت طولت المدة.

عبد الناصر: فيه ناس عايزه تسترد أرض وتصفى الدين العام اللي بنتكلم عليه؛ اللي واخذ منه ستين فدان بياخذ خمسة وعشرين جنيه عايز ياخذ أرض ويصفى السندات، أنا بدى أقطع لازم يكون بقى وضرورى وتمشى العملية النهارده مش بكره ولا بعد بكره .

هو ده أساس الفكرة هو أساسين اللي بنتكلم فيهم، لو أنا النهارده مثلا اتاخذ منى ألف فدان والمفروض إن فيه دين عام وأنا المفروض عندى سندات مجمدة عايز أستنى اليوم اللي تيجى فيه حكومة برجوازية أو كذا علشان توقف العملية، ولكن تعرف لو طلعت سندات بيبقى صعب. أما عملوا عملية التأميم فى سوريا أما ده حصل رجعوا تانى يعنى مش لغوا التأميم! أما بقى إنت بتلغى السندات النهارده وخلص مع تعويض يعنى جزء إنه يعيش حياة كريمة.

صبرى: عادية.

سرى للغاية

عبد الناصر: لكن الدين اللى علينا كده اللى واخدين منه ١٠٠٠ و ٦٠٠ و ٧٠٠ فدان والـ ٣ مليون جنيه بتوع عبود؛ دول بقى بيقى حسمنا الموقف، هل ده أحسن فى الشكل؟

محي الدين: أنا فى اعتقادى إن الشكل أحسن ومبيقاش التأثير بتاعها عنيف؛ لأنه هذا الشخص سواء له دين ولا ملوش دين هو معادى حيثمنى اليوم اللى يقدر يرد فيه هذه الأموال؛ الهدف.. يمكن الهدف واحد.

عبد الناصر: أنا بتكلم فى هدف وإنت بتتكلم فى شكل، يعنى هى ثورة اشتراكية أنا مقولتش حاخذ حرمهم، وبعدين متهيألى العملية حتمشى.

عامر: لأ.. نقطة أهم يعنى الحقيقة الناس بتقول معايا سند.

الشافعى: ده هو الناس قاطعة الأمل.

عبد الناصر: الحرب اللى فانتت الناس معاها الماركات الألمانية وألمانيا بتتهزم وتضرب ومستنيه عندها أمل.. ألمانيا فى الحرب الأولى.

الشافعى: آه.. هو كل الناس العاقلين فاقدين الأمل يعنى عارفين العملية. (ضحك)

محي الدين: ده كلامهم بالنسبة للحراسة؟

عبد الناصر: لأ.. أنا بتكلم فى الحراسة والتأميم وكله، وأنا بدى أقلب الحراسة على تأميم وبعدين تتصفى العملية.

محي الدين: كلها؟ وبعدين فى التأميم فيه ناس كتير عندهم حاجات صغيرة طبعاً.

عبد الناصر: آه.. كله.

الشافعى: بس يقدر يعيش..

سرى للغاية

محي الدين: فوق الحد ده بيبقى مجمد يعنى.

عبد الناصر: أنا رأيى فوق الحد بيبقى عشرة واللى باقى..

الشافعى: ينتهى.

طراف: للتأميم والحراسة؟

عبد الناصر: كله يعنى كله.

طراف: الحد والباقى بيبقى، بس هو المهم إن الحد يكون فيه كرم شوية عشان يقدروا يعيشوا الناس معيشة مقبولة باعتبار مفيش أراضى مفيش ثروات مفيش شئ.. الحد اللى يغطى.

عبد الناصر: إيه بقى الحد المحترم ده هو؟

طراف: ما هو ده اللى بنتكلم فيه بقى. (ضحك)

أصوات: (ضحك)

عبد الناصر: ٥٠٠ جنيه حد محترم مثلا يعنى.

طراف: ٥٠٠ جنيه بصفة عامة يعنى. (ضحك)

عبد الناصر: يعنى كان الواحد عشان يحوش ٥٠٠ جنيه تبقى معجزة. (ضحك)

أصوات: (ضحك)

الشافعى: هل الأحسن مرتبات ولا؟

سرى للغاىة

عبد الناصر: لازم ياخذ فلوس ويشتغل.. ايه المحترم ايه؟

عامر: ١٠٠ فدان.

عبد الناصر: ها؟

عامر: الـ ١٠٠ فدان.

عبد الناصر: عندك كام فدان؟

طراف: معنديش ولا حاجة.

ابراهيم: لأ.. يعنى ناخذ standard فى العملية كلها.

معى الدين: لأ.. دى عيشة للكل.

ابراهيم: يعنى يالما ننزل ما قيمة الـ ١٠٠ فدان لـ ٥٠ ونخليها كلها ما قيمته متوسط قيمة الـ ٥٠ فدان مثلاً، ويبقى الكل فلاحين ورأسماليين وكله يعنى نحط حد أقصى بتاع الملكية.

عبد الناصر: الكلام ده اتحدد فى الميثاق يعنى فى حدود الميثاق.

ابراهيم: فى حدود الميثاق يبقى الـ ١٠٠ فدان يعنى اشمعنى دول مش حديهم أرض.

طراف: مش حديهم أرض.

ابراهيم: ما قيمته ١٠٠ فدان.

عبد الناصر: لأ.. لأ.. تمنهم يعنى.

طراف: آه.. ده ممكن.

سرى للغاية

ابراهيم: ٣٠ ألف حد أقصى، هو طبعاً فيه فدادين أحسن من كده بتاعة جناين.

محي الدين: لأ.. أنا ما بتكلمش على الأرض العادية..

صوت: ٤ جنيه أكثر ضريبة.

ابراهيم: متوسط يعنى.

الشافعى: $٧٠ \times ٤ = ٢٨٠$.

البغدادى: يعنى هو ٥٪ ضرائب ٢٠٠ فى ٥٠.

صوت: يبقى دخله ٢٠٠٠ جنيه فى السنة يبقى مش حدى له.

عبد الناصر: بس كام واحد يعنى كتير دخلهم ٢٠٠٠ جنيه فى السنة فى الضرائب اللي احنا خدناها.

طراف: لأ.. ما هو على قدر اذا كان هو أصلاً ثروته أقل من كده حياخد أقل يعنى.

الشافعى: كحد أقصى.

طراف: مع الجماعة اللي ثروتهم تزيد عن هذا الحد.

عبد الناصر: ليه يعنى ٢٠٠٠ جنيه فى السنة حاجة يعنى كبيرة.

حسين: يعنى أقل من ١٥٠ جنيه فى الشهر.

الشافعى: يعنى ١٥٠.

سرى للغاية

عبد الناصر: أنا بتكلم على مستوى الارستقراطى، يعنى كام واحد فى البلد دخلهم حسب مصلحة الضرايب؟

صبرى: هى العملية الحقيقة سياسية قبل ما تكون اقتصادية نمرة واحد، وبعدين منقدرش نقول ١٠٠ فدان لأن نفرض واحد عنده ١٠٠ فدان طب ما هو حيمسك البلد وهو عايش فيها. وبعدين أنا متهيألى إنه متوسط أرقى دخل للناس دول فى حدود مثلا وكيل وزارة ١٢٠٠ جنيه أو ١٥٠٠ جنيه ده maximum من ناحية حتى الوزارات.

طراف: فى السنة؟

صبرى: فى السنة، وبالنسبة للأرض بالذات يعنى أنا عندى اقتراح إنه لا يمكن يزيد عن ٢٥ فدان كحد أقصى، وده حسب الكلام اللي حصل فى المؤتمر الوطنى إنه الرأسمالية الوطنية بنعتبرها ٢٥ فدان؛ يعنى اللي بنعتبره فوق الـ ٢٥ فدان مهواش رأسمالية وطنية.

ابراهيم: أنا بقول: إحنا من اللي كان عندهم أرض كسبنا ١٠٠ فدان ففى نفس المستوى ناخد..

صبرى: آه.. بس يعنى..

إبراهيم: اللي عنده بيوت واللى عنده..

صبرى: ده أعداء الشعب وده مش أعداء الشعب.

عبد الناصر: ده حاطين عليه حراسة والتانى محطناش.

ابراهيم: لأ.. اذا كان بتوع الحراسة بيبقى وضع تانى.

سرى للغاية

عبد الناصر: كان فيه ناس..

ابراهيم: لأ.. ما إحنا قلنا الموضوع كله يعنى كل اللى دخلوا فى القانون ١١٧ و ١٨ و ١٩.. الى آخره كل الناس، يعنى اللى عنده عقارات النهارده مامسينا هوش.. اشمعنى يعنى سايبين ده.

عبد الناصر: أنا مش فاهم والله الموضوع ده.

طراف: هو عايز يحدد الثروة عموما يعنى اقتراحه.

ابراهيم: يعنى هو المسألة نحدد الثروة كلها بتاعة كل الناس.

عبد الناصر: يعنى إحنا جينا فى أدوات الانتاج وخذنا فيها اجراء، اللى هى القرار ١١٧ و ١١٨ و ١١٩ والاصلاح الزراعى، وبعد كده جينا فى أكتوبر اللى فات وأخذنا قرار بالنسبة للحراسة وجزء كبير جدا من بتوع ١١٧ و ١٨ و ١٩ داخلين، وبعدين حنىجى نقول النهارده: عشان نحل الموضوع ده نحدد الثروة؟ نقدر نحدد بيانات لأن مستحيل أبدا الكلام تحدد الثروة ده مستحيل جدا، يعنى بالنسبة للاعتراف فيه استحالة نحدد الملكية بالاقرار.. يعنى بندخل فى موضوع تانى هو يختلف حتى عن الأسس اللى احنا يعنى..

ابراهيم: فيه ناس مدخلوش تحت الحراسة وطبق عليهم القوانين ١١٧ و ١٨ و ١٩، دول حددنا ثروتهم. الناس دول قطعاً منهم كانوا بيحاولوا إنهم يبذلوا مجهود فى ناحية انتاجية، برضه ده مع كل اعترافى بالمساوى بتاعت الموضوع إحنا حددنا ثروتهم، وبعدين اللى مكانوش مشتغلين فى الانتاج وبيبنوا بيوت دول سايبينهم.

عبد الناصر: أمال البيوت مهياش أدوات انتاج؟

ابراهيم: مهياش أدوات انتاج أيوه.

سرى للغاية

عبد الناصر: وأدوات الانتاج يعنى الثانى اللى بيشتغل الانتاج وييعمل ربح، هو ده اللى احنا حددناه اللى هى تصل الى عملية ايقاف استغلال الانسان للانسان الى حد كبير. العمليات الثانية متدخلش الحقيقة ضمن الاقتراح ده، فيه ناس عندها فلوس فى البنك.

الشافعى: تتعرض لها الضرايب.

عبد الناصر: فيه ناس عندهم عنده مليون جنيه.

الشافعى: الضرايب هى اللى تتعرض.

عبد الناصر: يعنى متقوليش ساوى الشوربجى باللى عنده أو ساوى ده بده أو مصنع السماد بده، ويعدين بتقول: العمارات منقدرش يعنى فيه استحالة من مجاميعه وإحنا بحثنا وجارى العمل حتى السنة اللى فاتت وجدنا إن فيه استحالة.

محي الدين: صعب.

عبد الناصر: آه.. هى العمليات اللى هى استغلال أدوات الانتاج، الكباريه برضه فيه استغلال! (ضحك)

أصوات: (ضحك)

الشافعى: غير مشروع! (ضحك)

عبد الناصر: إحنا اخدنا العملية اللى الواحد فيها بيستخدم أدوات انتاج وبيأخذ مجهود غيره، لما حبيننا حتى نوسع اختلّفنا يعنى وجدنا فيه استحالة كبيرة جدا. ويعدين على أساس إنك تعمل مبدأ عام وتقول إن أنا باحدد ثروات الناس كلها وتحدد الثروات، هو الحقيقة تأمين أدوات الانتاج بنقل أدوات الانتاج الى ملكية الشعب. لما تيجى تنقل أدوات الانتاج الى ملكية الشعب بيحصل ايه؟ طلع واحد عايز ٣ مليون وواحد عايز أكثر هل أخلى مع ده ٣ مليون وده ٥ مليون وواحد سندت بـ ٢٠٠ ألف.. الى آخر هذا الكلام؟ دى العملية اللى أنا بقول إن احنا النهارده بنصفيها.

سرى للغاية

ابراهيم: يعنى مسألة سندات يعنى هو بييجى له عائد من هذه السندات، ولكنه لا يستغل الإنسان فى الحالة دى باعتبار إن الدولة هى اللى أشرفت على وسائل الانتاج كلها؛ اذاً هو عنده ثروة ولكن لا يستغل بها فرد، يبقى حكمه فى هذه الحالة حكم اللى عنده بيت فليه أنا حاجى وأقول أدى له حد هنا وبعدين..

عبد الناصر: آه.. لأن أنا بقول: أنا بعد ما نقلت ملكية أدوات الانتاج للشعب بقول إن هو خد قصد هذه الثروة أرباح فى سنين كثيرة، الأصول الحقيقية مكانتش أدى له حاجة ليه؟ لأن حمل الشعب أعباء لا حمل له بها اللى هى الدين العام.

ابراهيم: لأ.. ما الدين العام ممكن غير قابل للاستهلاك.

عبد الناصر: إحنا قاعدين هنا بكره فيه غيرنا قاعد هنا وبعد بكره فيه غيرنا قاعد هنا، وواحد بيدى له ١٠٠ ألف جنيه أو بيقول له: أدى لك ١٠ آلاف جنيه أو بيطلع قانون بيرجع له.

الشافعى: ده صحيح.

عبد الناصر: ده السبب ولا ايه؟

ابراهيم: لأ.. الأمل أنا مع سيادتك فيه.

عبد الناصر: يعنى أنا بدى أضمن مبقولش بكره يعنى قول العملية بعد ١٥ سنة واحد بييجى يقعد هنا ومتعرفش حد عارف؟! يعنى دى الحقيقة الفكرة اللى بخرج بيها لأن حيبقى فيه على كام مليون.. يعنى الأرض والتأميم والكلام ده. أنا بقول: يعنى بندى حاجة.

عامر: موضوع السندات بدون شك..

عبد الناصر: لأ.. تحط مبدأ أنا باعتبارها خطوة.

السادات: لأ.. دى خطوة مؤقتة.

سرى للغاية

عبد الناصر: وعلى أربع أشهر بعمل الخطوة الثانية. متهيألى أصلا فيه مشروع الحقيقة بعنبره فكرة بتكلم عليها وإلا بيبقى سيف معلق كده على هذه البلد.

الشافعى: الدستور القديم كان بيقول مفيش مصادرة بدون.. كان فى ٥٦.

عبد الناصر: ما التعويض عادى ما إحنا حندى تعويض.

الشافعى: (ضحك)

ابراهيم: لأ.. ما دام فيه ceiling يهيئ حياته.

رفعت: أنا بقول: لو نحدد مستوى معيشة معين لأى فرد أو عائلة تعيش بيه، وبعد كده تبحت كل حالة على هذا الأساس.

عبد الناصر: واحد ومراته وواحد وأولاده.. ماشى آه.

طراف: أظن هنا فيه تفاوت برضه.

صوت: وفيه ١٢ وفيه ١٦.

عبد الناصر: ده ممكن قوى.

الشافعى: عشان كده الواحد كان بيقول مرتبات ببقى يعنى..

عامر: ما هى زى المرتبات.

صبرى: بس بالطريقة دى حتبقى صعبة جدا.

سرى للغاية

صوت: هى صعبة لكن حالة.. حالة.

عبد الناصر: لأ.. قواعد، الراجل كذا والراجل ومراته كذا والراجل ومراته وولاده..

عامر: قاعدة.

صبرى: الراجل ومراته وولاده القصر كذا.

عبد الناصر: آه.

الشافعى: بحد أقصى ثلاث عيال مثلا.

محي الدين: وولاده البالغ ما هم داخلين فى العملية.

طراف: البالغ داخلين برضه.

محي الدين: إحنا حاسبناها على كده.

صبرى: البالغ بيكون عيلة.

محي الدين: يعنى اتوضعت عليه الحراسة على أساس إن هو جزء منه عيلة، وفى بعض الحالات بيبلغ وبعض الحالات مبيبلغش.

الشرباصى: يعتبر عيلة لوحده.

سرى للغاية

البغدادى: وقواعد جديدة وحياد ايراد أكبر مما كان يحصل عليه قبل التأميم، أصل هي العملية عايزه تتقدر برضه.

عبد الناصر: لأ.. مش ممكن حدى له ايراد أكبر.

الشافعى: لا.. لا.. لأ.. طبعا مش معقول. (ضحك)

عبد الناصر: مثلا بحد أدنى ٢٠٠ جنيه، فهو طلع ٢٠٠٠ جنيه لكن ميخدش غير الـ ١٠٠٠ جنيه.

عامر: لأ.. هو بحد أقصى، نقول: الراجل ومراته ويحد أقصى بصرف النظر عن القصر..

الشافعى: آه.. هو فعلا.

طراف: فيه واحد عنده عيلة وأولاده كل واحد عنده خمس ست عيال لوحده!

رفعت: لأ.. هو بيقصد الحالات الزوجة بتملك ويمكن الزوج بيملك أقل.

محي الدين: وفيه واحدة مثلا وضعت تحت الحراسة وأبوها مش موضوع تحت الحراسة لأن باسمها هي اللي بتملك.. يعنى هي حالات خاصة يعنى عملية عايزه مناقشة.

عبد الناصر: هم كام واحد؟

محي الدين: هم حوالى بين ٩٠٠ و ١٠٠٠ عيلة.

عبد الناصر: بيبقوا كام واحد يعنى؟

الشافعى: ٥ متوسط ٥٠٠٠.

محي الدين: أكثر من ٥٠٠٠ يمكن.

سرى للغااية

عامر: لأ.. تتحط على أساس واحد وأبوه وأخوه مثلاً.

الشافعى: ٥٠٠٠ فرد.

معى الدين: اللى يملكوا ٥٠ ألف فأقل مجموع أموالهم ٧ مليون جنية، اللى يملكوا فوق ٥٠ ألف ٦٣ مليون جنية مجموعها. واضح إنه العدد اللى كان بيتقال إنه ٥٠ ألف يعنى عدد بسيط.

عبد الناصر: هى الحراسة ٧٠.

الشافعى: الأجانب منهم حاجة وعشرين.

معى الدين: أنا شايف إن الحاجات دى يمكن توصل الى ٧٠.

صبرى: دلوقتى ما هو لازم نحدد، مثلاً هات واحد كل ثروته أسهم وقلنا مثلاً رقم ٥٠ ألف لأن الأسهم لا يجوز أن يملك أكثر من ١٠ آلاف جنية حسب القانون.

عبد الناصر: النهارده يجوز، يعنى هو مثلاً اللى انت بتقوله لكن واحد عنده أكثر.. كام واحد يعنى فى الألف؟ يطلعوا ٥٠٠٠.

صبرى: الأرض حوالى ٧٥ ألف فدان.

عامر: أهو دول أكيد عندهم كلهم أكثر من ١٠٠ فدان.

معى الدين: ما هو إحنا حاندى جزء من الممتلكات ولأ حنديهم فلوس تعويض؟

سرى للغاية

- صبرى: هو فيه properties.
- محي الدين: هي دي النقطة.
- عبد الناصر: هو حسب الكلام الأول بندي فلوس، كلام الأخ شرباصى كان طلب إن احنا ندى أرض.
- الشرباصى: أصل قاعدين فيها.
- عبد الناصر: وبعدين اتكلمنا على ممكن ٢٠ - ٢٥ فدان على هذا الأساس أصل بنطلع لـ ٤٠ أو ٥٠ فدان بيبقى يعنى ..
- الشرباصى: أصل فيه ناس قاعدين فى الريف وبيزرعوا.
- صبرى: طب ما حياخد ٢٥ فدان.
- الشرباصى: يبقوا مصدر متاعب هو بيزرع وبينتج النهارده.
- الشافعى: ميعرفش غير كده.
- الشرباصى: أنا لما حادى له القرشين مش حيقدر يستغلهم.
- صبرى: ٢٥ فدان.
- الشرباصى: خلىنا نتكلم، إحنا دلوقتى الأحقاد بتقوم الثورات والثورة اللي كانت سنة ٥٢ كانت نتيجة ظلم اجتماعى بأحقاد؛ فإحنا النهارده محناش عايزين ندى لواحد قرشين نقول له أقعد فى الريف. اللي جه فى رسالة الرئيس.. لما آجى أنزع ملكية فدان من واحد منافع عامة يقول لى: طب إنت حاتدينى ٢٠٠ جنيه أوديهم فين؟! ادبنى فدان من الاصلاح الزراعى أزرع فيه لأن القرشين اللي حتديهم لى النهارده أنا حصرهم.

سرى للغاية

عبد الناصر: ما هو فيه ناس تانية مش لاقيه الفدان ولا لاقيه الطين ولا لاقية أى حاجة ولا لاقية تشتغل!

الشرباصى: أيوه.. صح الكلام إحنا مابقولش مانديش له.

عبد الناصر: إحنا بنتكلم عن طبقة ونسيب البلد كلها!

الشرباصى: أنا مابقولش حاجة انما أنا بقول وضع النهارده، يعنى مانديهمش قرشين ويقعدوا فى الريف، أنا مابقولش إلا إن احنا عايزين نعالج المسائل. حقيقة فيه ناس انما فيه فرق مثلا فيه واحد النهارده بيشتغل، وفيه فرق واحد بيشتغل النهارده وأقول له بكره متشتغلش.

عامر: أنا بتكلم على الشخص اللي اتحط..

عبد الناصر: لكن اتحط بسبب.

عامر: أو بدون سبب.

عبد الناصر: يعنى كمان حتى اللي اتحط بدون سبب نقول بيبقى واحد أو اتنين..

عامر: أو عشرة .

عبد الناصر: ومنجيش علشان اللي بدون سبب دول نبوظ العملية كلها.

الشرباصى: اللي اتحط بسبب أصادر أملاكه لأن ده ميصحش.

عبد الناصر: أنا نفسى أعرف مين اللي اتحط بدون سبب؟! لأنى أنا قعدت وإنْت قعدت وفيه ناس قعدت ومسكت كشوفات وقالوا: ده يتحط وده يتحط وده يتحط، طب أحب أعرف يعنى اللي اتحط الآخر فى هذا الوقت هم النواب؛ فمش عشان واحد اتحط بدون سبب أو عشرة اتحطوا بدون سبب نعمل قاعدة ونعمم العملية كلها! كل الكشوفات اللي اتحطت ماعدا الكشف اللي طلع الآخرانى وده بتاع نواب.

سرى للغاية

محي الدين: فيه ناس ليهم نزعة اجرامية وفيه زعماء التكتلات يعنى.

عبد الناصر: واحد ولا أكثر؟

محي الدين: هو اتحط على أساس اجرامى، لأ.. وبيجيب ناس بيأجر ناس على القتل.

عبد الناصر: هو فيه بس واحد طلع من قاعدة عامة.

عامر: الأولانى صح.

عبد الناصر: وعندى أنا المسودات.

عامر: الأولانى صح له.. الأولانى صح.

عبد الناصر: فإذا كان حد بيقول إن فيه حاجة غلط بالنسبة لكشف النواب أو كشف..

محي الدين: كشف النواب يعنى..

عبد الناصر: طيب سيب الكشف ده على جنب، هل الأولانى فيه سبب ولا مفيش سبب؟

عامر: يعنى ده فيه سبب طبعاً.

عبد الناصر: أما باجى أعمل قاعدة وأقول: أنا بادی ٥٠ فدان على أساس إن فيه ٣ غلط أو ١٠ غلط أو ٢٠ غلط، لو فيه عيلة يعنى العيلة كلها ببيان مثلا ٥٠ وكذا وكذا العيلة كلها بيطلع عندها فى حدود ١٠٠٠ فدان وده يتحط تحت الحراسة. وبعدين إحنا لما كنا بنتكلم الدور اللى فات قلت أنا: إن العملية يمكن مانديش أرض وبعدين قلنا ندى ٢٠ وبعدين دلوقتى بنعمل قاعدة؛ بنعمل قاعدة إحنا بنقول: بندى ٥٠ يعنى طلعتنا ٥٠ النهارده يعنى المناقشة وصلت ٥٠.

سرى للغاية

محي الدين: هو سيادتك لكن هو لا يملك غير أرض حسب والقواعد اللي وضعت حياخد أرض؛ لأن أنا كنت عامل أسبقيات بحيث نخلي الأرض فى الآخر، لما يجى ياخد ceiling بتاعه ياخده من مثلا أوراق مالية عمارات حاجات زى كده بحيث يعنى يتحرك ويروح لأنه الحقيقة وجود العصبيات.. هدفى التالى اذا كان مالوش غير أرض، حسب القواعد اللي واضعيتها حتى الأرض فى الآخر حياخد أرض من الضريبة.

عبد الناصر: أنا لسه كنت بتكلم عن إنه كان فيه كلام إن مفيش داعى للأرض والأرض كلها تتوزع، برضه مناقشة واتكلم الأخ شرباصى وقال: فيه ناس عندها حتة أرض صغيرة وبتعيش عليها، قلنا: برضه نعمل ceiling للأرض، وكان الكلام على ٢٠ يعنى الكلام اللي كان اتخط فى المناقشة وعلى سأل عليه هو الكلام مزدناش عن ٢٠.

عامر: أنا بقول وجهة نظرى فيه ما هو برضه..

عبد الناصر: كام واحد؟

محي الدين: على فاجئنا كان عندى البيانات كلها حوالى ٥٠ تقريبا.

عبد الناصر: والراجل مالك أد ايه ومراته مالكة أد ايه؟

عامر: هو ومراته وولاده.

محي الدين: ملكية العيلة موجودة عندنا البيانات بالكامل موجودة وملكية رب العائلة وبقية العيلة موجودة بره. على ما أذكر المجموع إن كان ٨٠ يبقى ٢٤ للعيلة و٥٦ لرب العائلة مليون جنيه، أنا بتكلم بالصورة العامة. هى النقطة مش فى الأرض النقطة فى الـ ceiling يعنى أد ايه يعيش بيه شهر أو حاجة زى كده؟ هو يمكن ده يحدد المسائل دى كلها يعنى إن كان أرض يبقى أد ايه وغيرها يبقى أد ايه نضمن له ايراد؟

سرى للغاية

عبد الناصر: هو ceiling ٥٠ ألف جنيه.

محي الدين: كنا حاسبينها على أساس دلوقتي ٤٪.

صبرى: هو تقديري أنا ٣٠ ألف يعنى.

محي الدين: على أساس ٥٪؟

صبرى: آه.

محي الدين: يستثمرها فى ايه؟

صبرى: اللي عنده عمارة يجيب ٧٪ حتى اللي عنده أوراق مالية ٥٪.

محي الدين: ليه؟ ده أنا مديش أكثر من ٤٪ من الأول.

الشافعى: الأوراق المالية.

عبد الناصر: مثلا اللي عنده يتحط تحت الحراسة ده يتحط تحت الحراسة.

محي الدين: كلهم عايشين فى نفس المستوى.

صبرى: فى نفس المستوى وأحسن.

عبد الناصر: لأ.. أيام التأميم يعنى كلهم كانت التحف ماتحطت تحت الحراسة، الفلوس اللي تحت البلاطة ماتحطت تحت الحراسة والعفش، بنحطه تحت الحراسة يعنى عبود يعنى عنده حاجات ماتحطت تحت الحراسة.

سرى للغاية

طراف: ما صورة عبود وسراج الدين وغيره صورة يعنى الحقيقة ماتت عكسش على الباقيين، يعنى هو الأخ بيتكلم ممكن متأثر بأوضاع تانية غير اللى مع دول لأن دول يعنى مصادرة كاملة بالنسبة لأملكهم دى حتى الناس تقبلوها. لكن الحقيقة فيه عدد برضه يجوز إنهم يكونوا محل عطف الناس لأن حالتهم فى ضائقة، وهم أظن مش أصحاب ثروات ثم يجوز مايكونش لهم نشاط يعنى يجوز طلوعوا برضه عن طريق وشايات ويعنى مفيش نشاط معين يصح الواحد يقول إن ده خصم للثورة أو عمل عمل ايجابى أو حاجة من هذا القبيل. فيه غيرهم كتير زيهم بره ماتحطوش تحت الحراسة.. فدول الحقيقة اللى بيخلوا الواحد يتكلم فى الموضوع على اعتبار إنه..

عبد الناصر: ما كل واحد بيتكلم بيختار صورة معينة، أنا قصادى صورة عبود!

أصوات: (ضحك)

عبد الناصر: ولذلك مين اللى اتظلم؟

طراف: والله هاضرب لسيادتك مثل راجل آهو كان من الناس الرجعية كان عنده يجى ١٠٠٠ فدان فى الفيوم اسمه أحمد معبد، وشخصيا ده راجل أنا حكى عليه إنه راجل على خلق وده حتى من ضمن الناس اللى استثنيتهم فى حكم مجلس الثورة، وبعدين أخذ منه ما يزيد طبقا لقانون الاصلاح الأولانى وعاش فى حدود المقرر له وبعدين وضع تحت الحراسة.

محي الدين: معبد بتاع الفيوم؟

طراف: آه.

محي الدين: دول من كبار الاقطاعيين وراجل بخيل والفلاحين يعنى..

أصوات: (ضحك)

محي الدين: مش هو ده بتاع الفيوم؟ وحارم الفلاحين من كل حاجة!

سرى للغاية

أصوات: (ضحك)

طراف: والله العظيم هذا الانسان حتى من أفضل الناس الموجودين من قبل الثورة وكان راجل أعرفه.

الشرباصى: محمد سويلم ده كان فى سنة ٥٦ آوى ٥٠٠ تاجر من بتوع بورسعيد!

عبد الناصر: مات؟

محي الدين: لأ.. نائب.

الشرباصى: بقول لسيادتك: من سنة ٥٦ وإحنا بنمر هناك ولما سيادتك بعتنا علشان ندى فلوس للاجئين كان بياوى ٥٠٠ واحد من بورسعيد بكشوفات والأسماء كانت موجودة بيوكلهم.

عبد الناصر: طب أنا والله بدى عشان نصفى الموضوع بأطلع الصور دى بنستبعد كشف الأسماء ونعيد نظر من تانى، أما ليه بقى؟ هو بينكلم فى موقف جديد وإنت بتتكلم فى الموقف القديم..

الشرباصى: أنا بقول لسيادتك صور صحيحة.

عبد الناصر: معلىش إحنا بنتكلم على صورة واحدة اللي هو سويلم.

حسين: ده صحيح يعنى يمكن.

عبد الناصر: يعنى المناقشة الحقيقة متأثرة بواحد..

الشافعى: واحد يعنى.

سرى للغاية

عبد الناصر: أنا الحقيقة متأثر بعبود، لكن لما الواحد يبقى متأثر بواحد ويعدين بيأثر على قاعدة حتمس الكل علشان هو فى مخه سويلم أو معبد أو أديب، بتبقى الحقيقة المناقشة ماشية غلط.

محي الدين: بس إحنا لما ناقش على الأساس ده هتختلف التقديرات، يعنى مثلا إحنا طبعاً وضعنا على أساس معلومات معينة، على ما أذكر موضوع سويلم بالذات إنه من ضمن المسائل اللي جت فى تقريره إنه تنازل فى دائرة معينة لعيلة سراج الدين.. على ما أذكر هو ده.

الشرباصى: أبدا.

محي الدين: يعنى حاجة زى كده يعنى حبيب لك أنا الكلام ده كله.

الشرباصى: عيلة سراج الدين موجودة فى بيلا وهو موجود فى دكرنس، وكان بيتشرح فى دايرة سرنباى القديم.

عبد الناصر: طب بنشوف الكشف ده بالذات بنشيل بقى من العملية الكشف الأخرانى اللي هو..

طراف: الحقيقة أنا معرفش الكشف الأولانى ولا الأخرانى.

عبد الناصر: هو ده بتاع النواب، هو فيه سويلم وفيه معبد وفيه المجرمين فيه النواب والمجرمين بره..

أصوات: (ضحك)

عبد الناصر: والباقي اللي جبتوه من راسكم نقوم نقدر نتكلم الحقيقة صح.

طراف: ما إحنا كنا عايزين أسمائهم الحقيقة معندناش كشف بالأسماء.

رفعت: يعنى تبحث كل حالة على حدى.

سرى للغاية

محي الدين: يعنى ده من أجل حالة.

عبد الناصر: هل عندك صورة برضه فى راسك بالنسبة للحل؟

رفعت: معرفش يمكن ..

عبد الناصر: فيه صورة.. فيه حد معين يعنى؟

رفعت: أنا أعرف واحد كان حارب فى بورسعيد موضوع تحت الحراسة!

أصوات: (ضحك)

محي الدين: اسمه ايه محسن؟

عبد الناصر: ده عنده أد ايه ده؟

رفعت: عنده ١٠٠ فدان.

عبد الناصر: طيب ما هو ده محسن..

رفعت: والله هو يعنى لا هو شيوعى ولا..

محي الدين: تختلف التقديرات لازم فيه تقدير واحد.

عبد الناصر: لأ.. أنا بقى محسن عارفه، وهو مش حارب فى بورسعيد وطلع من قبل الثورة وكان فى

الولاد بتوع مصر الجديدة؟

رفعت: أيوه.

سرى للغاية

عبد الناصر: قصى مانناثرش بصور واحنا بنحط القاعدة؛ لأن لو كل واحد اناثر بصورة ده بمحسن وده فلان وده بعلان بيبقى المبدأ سلبى.

طراف: لأ.. بس بيخلى الواحد وهو بيوضع المبدأ بيبقى مش عايز ببقى فيه ظلم؛ عشان كده ده بيخلى الواحد ببقى حريص إنه..

الشافعى: بس ظلم دى الحقيقة تقديرية يعنى.

معى الدين: آه.. قطعا تقديرية بالنسبة هل الاجتماع على أساس حكم محكمة ولأ على أساس اقتصادى أو اشتراكى أو..

صبرى: هو الموضوع التانى اللى أثير.. التجارة الخارجية: سيادتك يعنى برضه نوقشت، وبالنسبة للموقف النقدى هو فيه مبدأ برضه يعنى لو ناخذ فيه توجيه متهيألى لازم نمشى عليه؛ وهو إن مش حنقدر نمشى بالخطه إلا اذا كان طبعا نحصل على النقد الأجنبى اللى يسمح لنا أن نمشى بالخطه، والنقد الأجنبى مش حيجى إلا من حصيلة الصادرات.

الصادرات بالنسبة للزراعة تقريبا ثابتة، أو يمكن اذا كانت حتزيد سيكون بشكل مش ملموس قوى، إلا لو نوعنا طبعا الصادرات بشكل تانى خالص. انما اللى يجب أن نواجهه بيه الموقف دلوقتى هو تصدير المنتجات الصناعية، واذا كان حنحط فى ذهننا هدف، متهيألى إحنا فى ظرف سنتين من دلوقتى يجب إن احنا من ناحية الصناعة صادراتنا توازى الالتزامات اللازمة للخطه الصناعية سواء فى استثمارات جديدة أو فى مستلزمات انتاج.

ده يستدعى إن احنا نصدر كل حاجة وفى كثير من الأحيان يعنى لازم يكون على حساب السوق المحلى. الى الآن السياسة اللى ماشية عليها وزارة الصناعة إنه الدولة بتوفر الانتاج للسوق المحلى أساسا وبعدين الفائض بتحاول تصديره، ولكن اذا كنا حنمشى على هذا الأساس مش حنقدر نصل للهدف ده كمبدأ..

عبد الناصر: بتصدر بأد ايه؟

سرى للغاية

صبرى: هو السنة دى الهدف بتاع تصدير الصناعة ٧٠ مليون جنيه، لأ.. الصناعة بس ٧٠ أو ٧١ مليون جنيه واحتياجات الصناعة حوالى ١٢٠ مليون! يجب إن احنا نوازن ما بين التصدير فى الصناعة والأعباء اللي موجودة لخطة التنمية فى الصناعة ومستلزمات انتاجها. وبالتالي يبقى الفائض اللي بنحصل عليه من التصدير الزراعى هو اللي بنواجه بيه مستلزمات الانتاج فى الزراعة زائد الخدمات العامة والمواصلات والحاجات دى. فيه حاجات نقدر نصدرها ولكن السوق المحلى مستوعبها بالكامل، ده معناه إن احنا بنقلل شوية من الاستهلاك المحلى فى منتجات صناعية كتير، وفيه مثل واضح أدامنا دلوقتى يعنى صفقة لتصدير مثلاً سماد من كيميا صحيح..

عبد الناصر: بس إحنا محتاجينه.

صبرى: ما هو صحيح إن احنا محتاجين للسماد ده ويمكن أكثر منه، لكن ممكن إن أنا أصدر وأستورد من بلاد بعملات أسهل، ويبقى على الأقل حظيت رجلي فى سوق أجنبى بعملات حرة؛ يعنى فيه حاجات بهذا الشكل الكبير، لكن الأسمنت طبعاً واضح وفيه حاجات كتير بهذا الشكل.

صوت: والسكر.

صبرى: والسكر.

عبد الناصر: هو إحنا الحقيقة لازم نزود الصادرات بالنسبة لكل حاجة تتصدر.

صبرى: هو ده بيحدد لنا هدفين الحقيقة أو ٣ أهداف حتى:

الهدف الأول: إن أنا بوازن الميزان التجارى من ناحية الصناعة.

الهدف الثانى: إن بكسب أسواق خارجية من دلوقتى وأبتدى أحط رجلي فى أسواق خارجية من ناحية المنتجات الصناعية.

والهدف الثالث متهيألى هو الأهم: إنه نقطة الضعف الوحيدة فى النظام الاشتراكى

الآن بالنسبة للصناعة costing & finishing هو إنه مفيش competition داخلى، يعنى الميزة بتاعة الميزان الرأسمالى بيبقى فيه competition داخلى بيرفع من مستوى

سرى للغاية

الانتاج ومن اقتصاديات المشروع؛ فلانم نخلق competition فى الخارج لأن منقدرش نخلقه فى الداخل لأنى أجبر كل واحد إنه يصدر، فغصب عنه عشان يصدر يحسن اقتصاديات مشروعه ويحسن من الـ finishing ومن الـ quality بتاعة السلعة.

عبد الناصر: إحنا قلنا: أى مصنع لازم يصدر، بعدين كل سنة نزود ١٠٪ من الصادرات يعنى من السنة اللى جايه بيبقى أكثر يعنى فى عشر سنين نبقى..

صبرى: يعنى هو حيدى short شوية فى السوق الداخلى بالنسبة للسلع.

عامر: إحنا بنصدر أسمنت أو سماء ٥٪ على الأقل على إن احنا منستوردش معلش.

معى الدين: بنتكلم على تصدير سلع جديدة.

صبرى: هو بالنسبة مثلا للسماد صحيح أنا محتاج لعله لكن لما بقول له صدر النهارده بيتعاقد، يعنى السعر النهارده بتاع السماد competitive فى العالى. عليه أقساط وعليه ٦٪ ومع ذلك بيقدر يبقى competitive ده بيدينى حتى indication إن المصنع ماشى صح. لو مابقولوش صدر السنة اللى فانت وزع أرباح لغاية البواب.. ده مش معقول هو الحقيقة كل ده على حساب الفلاح.

عامر: على حسب الميزان التجارى كله.

معى الدين: هو لازم عشان يزود حجم الانتاج بدل ما يوزع أرباح..

صبرى: أرباح ضخمة جدا.

حسين: بالنسبة للسلع زى السماد والأسمنت ده فكر نظرية سليمة، لكن بالنسبة للأسواق الصناعية الأخرى اللى بيتحكم فيها من بره السعر، وده إحنا قطعاً المرحلة دى سعرا فى معظم الحاجات غالى حنضطر ننزل الأسعار بتاعة التصدير ويمكن نزود هنا شوية. الى أى مدى حننزل الأسعار بتاعة التصدير للخارج؟ يعنى المفروض إنها تغطى كل الخامات اللى بنستوردها من الخارج وأقساط مثلا الاستهلاك بتاعة الممكن وقطع الغيار؛ اللى هى النقود

سرى للغاية

الأجنىبى اللى احنا بندفعه للمصنع ده بالذات فى الخارج plus حاجة معينه مثلا مقابل أجور العمال أو حاجة؛ فإذا كان السعر بتاعنا يبقى competitive مع حساب الحاجات أفكر يبقى ..

صبرى: وده ممكن فى معظم الصناعات.

حسين: ممكن ده الى حد كده يبقى سليم، لكن لو قل عن كده يبقى غير مفيد لأن حن دفع نقد أجنىبى علشان نعمل سلعة وبعدين مش حنجيبه من بره.

عبد الناصر: وبعدين هى النقطة الأساسية اللى احنا لازم نتكلم فيها علشان نقلل من الاستيراد من الخارج من السلع الوسيطة اللى بنستوردها للصناعة.. لازم نشوف السلع الوسيطة.

صبرى: هو الخطة اللى جايه يعنى ضرورى من هذا الكلام بالكامل. بالنسبة للقطن يعنى الأرقام موجودة، هو يمكن أنا عندى أرقام أحسن شوية انما يعنى بالنسبة للتصدير الارتباطات زادت؛ لأن أفكر كان زكريا أظن أثار الموضوع إن فيه عمليات واقفة نتيجة إنه بلاد طالبة يعنى ضعف الصفقات ومحدث بيبيت فيها بسرعة وشئ من هذا القبيل، وإحنا ماشين السنة دى على سياسة إنه مفيش صفقات خاصة.

محي الدين: هو كان مع ايطاليا.

صبرى: ليه بقى؟ لأن أول ما بعمل صفقات خاصة كل السوق بيعرف وبعدين بيتوقف ويقول لى كل واحد عايز صفقات خاصة، ووقفت العملية فى الصفقات نتيجة هذا كلهم كانوا مستنيين إن تعقد صفقات خاصة. لكن نتيجة إن احنا تمسكنا بعدم عقد صفقات خاصة فى العشر أيام اللى فاتوا الارتباطات زادت بشكل واضح، وحصلت ارتباطات وزادت عن ارتباطاتنا السنة اللى فاتت وحتى ارتباطات العملة الحرة يعنى أكثر من السنة اللى فاتت بالنسبة للحاصلات الزراعية الثانية كلها.

عبد الناصر: كام؟

سرى للغاية

صبرى: ٧٥٠ ألف حرة و ٧٠٠ اتفاقيات.

الشافعى: ١,٤ مليون.

صبرى: بالنسبة للمحاصيل الزراعية الثانية يعنى تقريبا كله اتعاقد عليه، وجميع المحاصيل الأساسية كلها ماشية حسب الأهداف ما عدا بعض السلع يحصل فيها عجز نتيجة ضغط من مطالب محلية زى مصانع زادت انتاجها. انما الرقم النهائى بتاع الأهداف كعملة تحقق فعلا مع الارتباطات الحالية مع العلم إن فيه حوالى ٣٠٪ من السلع لسه ماارتبطش عليها وجرى الارتباط عليها.

عبد الناصر: الرز تم الارتباط عليه؟

صبرى: هو الارتباط على الرز لغاية دلوقتى ٣٦٦ ألف طن، هو الهدف كان ٧٥٠ ألف طن ارتبطنا على ٥٦٦ لكن حسب المحصول مش حنقدر نرتبط بأكثر من ٦٥٠ ألف طن.

الشرباصى: المحصول كام؟

صبرى: لسه مطلعش الرقم بتاعه انما الهدف كان ٢٢ مليون جنيه حصيلة الرز، إحنا حصلنا فعلا دلوقتى ٢٧ مليون جنيه مع العلم إن احنا مرتبطناش..

عبد الناصر: الأسعار كويسة؟

صبرى: آه.. يعنى تعدينا الرقم من ناحية العملة فى الرز مع العلم..

طراف: عملة حرة ولا؟

صبرى: لأ كده أو كده يعنى عملات حرة خالص ٩,٥ مليون و ١٢ مليون..

سرى للغاية

عبد الناصر: أحسن ولاّ آيه؟

الشرباصى: برضه أحسن سوقه ماشى على الأقل، المياه شوية بس.

صوت: والسنة دى يعنى التنظيم..

الشرباصى: يعنى إحنا السنة دى كنا بنرمى ٢٠ مليون متر مكعب فى البحر.

أصوات: (ضحك)

الشرباصى: ٢٠ مليون بنرميهم، السنة اللي فاتت كانت المياه مقصرة مكنتش مكفية القطن والرز.

عبد الناصر: طب والسنة اللي احنا فيها؟

الشرباصى: والله ياسيادة الرئيس ما التتبؤ فى يناير يعنى فى..

عبد الناصر: عايزين نرمى ٢٠.

الشرباصى: عندهم مناطق ارتوازى.

صبرى: ٨٧٠ ألف دى المساحة اللي قدرت.

محي الدين: يعنى بعد خطة على نزرع فى حدود مليار ونص متر مكعب مياه من السودان لمدة عشر سنين.

سرى للغاية

عبد الناصر: وطبعاً فى الخطة الزراعية لازم..

معى الدين: يعنى تزرعوا بصل تزرعوا بطاطس تزرعوا رز.

صبرى: ما دى كانت ظاهرة عامة فى الآخر نتيجة الدودة بتاعت السنة اللى قبل اللى فاتت.

الشرباصى: أفكر زراعة الرز على مجال واسع فى الصعيد لأنه..

عامر: بيزرعوا قصب دلوقتى.

الشرباصى: وهم كانوا قللوا حتى فى أبو قرقاص زراعة القصب، هم كان المفروض إن يزودوه.

عامر: المفروض.

الشرباصى: دايماً يودوا من القطن ومن القصب لما القطن يرتفع سعره يقللوا زراعة القصب.

عبد الناصر: نكمل الجدول ده امتى؟ يوم السبت الساعة ستة.

أصوات: أيوه.

عبد الناصر: سلام عليكموا.

أصوات: سلام ورحمة الله.